

河上真人君官將一百二十人治北大理宮  
 主為天下吏民縣官致晏雨  
 四洲九江君五人官將一百二十人治太山  
 宮主起雲雨水炁  
 九江九海玄君官將各一百二十人河宮主  
 水炁風雨合符雲日中下雨以為効信雲下  
 兩主風雨靈臺宮中  
 漢明君官將一百二十人主攝天雷炁名主  
 人宮中  
 小玄明君官將一百二十人主攝河伯呂公  
 子三十六水帝十二溪女九江河平侯作攝  
 吏部水鬼與靈下雨  
 天河宮中九江北玄君官將一百二十人主  
 下水炁風雷合符沉雲日中下雨  
 太山宮中四水九谷君官將一百二十人收水炁  
 諸河伯水帝子三十六人下雨  
 太山宮中四水九谷君官將一百二十人主  
 起炁水炁  
 湖中玉女千二百人衣赤衣持雲炁水泉下  
 風雨制宴

主晴

九江北玄君官將一百二十人治中丙宮青  
 節霖雨請安主之  
 天翁正炁君官將一百二十人治內中宮主  
 月節上霖雨晏三日為始効信主之  
 江上玉女千二百人衣白衣持天炁主捕九  
 雷積霖雨致晏  
 天公正炁君一人官將一百二十人治食明  
 宮主月節霖雨清水清晏黃昏白日請天皇  
 正一法文經章官品卷之四

高上神霄紫書大法序

意一

昔太空未成元炁未生元始天王為昊莽溟  
 滓大梵之祖凝神結胎名曰混沌混沌既拆  
 乃有天地中外之炁方名混虛元始天王運  
 化開圖金容赫日玉相如天胸育妙精分闢  
 乾坤乃自玉京上山下遊過萬炁祖母太玄  
 玉極元景自然九天上玄玉清神母行上清  
 大洞雌雄三一混化之道生子八人長曰南  
 極長生大帝亦號九龍扶桑日宮大帝亦號  
 高上神霄玉清王一身三名其聖一也神霄  
 真王凝神金闕思念世間一切衆生三災八  
 難一切衆苦九幽衆苦一切罪魂受報緣對  
 浩劫相求無量衆苦不捨晝夜生死往來如  
 旋車輪我今以神通力憫三界一切衆生即  
 詣玉清天中元始上帝金闕之下禮請懇懇  
 乞問紫微上宮紫玉瓊藥之爰於九霄寶籙  
 之內請神霄真王秘法一部三卷皆梵炁成  
 文九天太玄雲霞之書上隱萬天之禁中隱  
 神仙萬年之法下明治人治鬼保國寧家之  
 道元始上帝即敕太皇萬福真君以高上神

霄玉清王長生謹命秘法傳付下世首教於  
 我以布世間學真之士佩法修行永為身寶  
 上衛帝王安鎮國土享祚萬年下以為民延  
 生度厄學道成真面拜真王驅除六天降伏  
 魔鬼用以施行符檄召攝鬼神一如神霄王  
 所教及億曾萬祖宗緒種親離苦昇遷一身  
 蒙福萬萬安榮次使自身得道尸解隱遷代  
 代流傳法門護持使道通達輕泄漏慢風刀  
 考身萬劫不原學士行之切宜遵守矣

高上神霄玉清真王紫書大法卷之一

總序大法源

大羅紫府天中有諸羣府諸帝之會天帝之  
 闕萬二千八十所隸各有司存悉皆檢察人  
 間善惡功過別無紀籍以為報施故貧賤富  
 貴壽夭未嘗為之子奪盡出人之自召示應  
 諸府闕以

昊天玉皇上帝為宗師而神霄玉清王今玉  
 帝就命人主準神霄玉清府又隸諸地山嶽  
 鬼神與北極紫微大帝府符命不同又非  
 混元上德皇帝所授三天扶教輔元大法師  
 秘籙一等今神霄玉清府神吏所轄諸地鬼  
 神告篆并靈官神吏使者將軍驅使吏兵異  
 號玉司考召靈文行此法每月三九日神霄  
 玉府神吏降聖朝會勿飲食葷酒戒色持齋  
 切須謹之

論籙

神霄法籙七階以流傳於人世自古以來未  
 嘗降見今得之者扶身保命度厄延年奉之  
 者仙官降祐消殄災非行之者却滅邪姦賊

除魔鬼當值斯文之士告盟神霄申奏主宰  
 得獲昭報然後方可奉行不可超越造次擅  
 用切宜遵守為尚矣

論秘訣

神霄玉文瓊臺秘訣則無所不關無所不攝  
 若能自保以奉持則坐持衆妙立使萬神寂  
 然不動感而遂通與衆法不同諸符不一倘  
 值斯文之士萬劫一傳有緣有幸無極無窮  
 可不勉勵精誠上析真貺若始勤終怠口是  
 心非法中靈官將吏記人功過毫分無失當  
 是時三官鼓筆無恕勿示非人豈不可謹勉  
 之戒之

論妙旨

神霄秘文玉司妙旨是謂玄奧難可尋詳雖  
 有秘籙依科修奉未有訣目要旨喻若衣服  
 裁割已了究竟不縫如何披穿訣者縫也今  
 將萬世秘文示學真之士乃若堅持苦志將  
 心救物法籙剪邪以皈正仙兵佐助以隨行  
 日就月將可達神霄之境功成名遂當昇浩  
 劫之家今列于左豈不深思允蹈之乎